

COLUMN

Pro idioms? – Pro rumantsch!

DA MARIA CADRUWI

Uauuuu! Tge campagna! Tge unda da forza ed engaschi che va actualmain tras la Rumantschia. Da Tschlin a Tschamut. In «stai si defend» ch'avess perfin fatg ch'il barbis da Giacun Hasper Muoth fiss sa muventà in zichel – schebain l'emprim ensi ubain engiu è in'autra dumonda. Il titel da la campagna: «Pro Idioms». (Jau na conusch nagn ch'è cunter ils idioms.) Il motto da l'engaschi actual: «garantir e refusar». Dus pleds che tunan en rumantsch grischun exact tuttina sco en sursilvan ed en sursilvan. En ladin ha l'«u» dal refusar si egliers da sulegl ed i ha num: refusar! En mias ureglas tunna quai in zichel pli lom. Ed en surmiran hai in diftong en il pled garantir ed ha num: garanteir! Tenor mai dat quest «ei» anc in zichel dapli vigur. Ma questas variantas na spartan betg la Rumantschia, ellas mussan sin il pli quant ritgs che nus essan. «In zichel» è dal rest rumantsch grischun. Per mai in bellezza pled. In ch'jau dovrel gugent e ch'jau hai emprendì grazia al rumantsch grischun. In zichel è oriundemain surmiran, igl è in pled che ma regorda adina puspè a mes amis ed a mias amias dal Surses. En mia vita professionala sco schurnalista da radio hai jau survegnì regalà blers pleds ord auers idioms. Era quai ha enritgì mia lavur. Ed jau hai astgà esser perditga quasi davent da l'entschatta en il svilup dal rumantsch grischun. Jau sun in fan dal rumantsch grischun – ed jau sun in fan dals idioms. Tenor il motto: «betg entweder oder, mabain so wohl als auch». Dependa nua e co.

Jau ma record anc bain: L'onn 1982 hai dà a Cuirà en l'Hotel Duc de Rohan ina saira d'infurmaziun cun il professer Heinrich Schmid. Per incumbensa da la Lia Rumantscha aveva el stgaffi directivas per dar furma ad in rumantsch da scrittura per tut ils idioms rumantschs dal Grischun, il rumantsch grischun. Schmid era in um intelligent, modest, bufatg e gist. El ha purschì maun ad ina gruppa da Rumantschs da buna voluntad ch'han vu-



li empruar en in temp dad ina nova renaschientsha rumantscha quai ch'auters Rumantschs avevan era già empruvà decennis pli baud – e depolarblamain fatg naufragi: Stgaffir per ina grappa pitschna, che sa divida sezza en gruppas anc pli pitschnas, insatge cuminaivel. Schmid ha fatg or da questa incumbensa ina lavur creativa. El ha mess ils differents rumantschs en relaziun in cun l'auter. El ha fatg or da tschingt idioms ed ina massa furmas dialectalas insatge artistic – ma betg insatge artifizial. Sch'jau vom a Ruschein tier la Marlis a cumprar chaschiel d'alp, lura discr'jau da «chischiell», ma per sursilvan scrit avess quai num correctamain «caschiel». Il rumantsch grischun è tant bler u tant pauc artifizial sco il «caschiel» sursilvan per ina da Ruschein, ni sco la «caura» sursilvana per in Medelin. Il rumantsch grischun è stgaffi ord substanza rumantscha cun resguardar maioritads e mintgatant er in zichel las minoritads. Il motto per stgaffir il rumantsch grischun n'è betg stà «garantir e refusar», mabain guardar tge che nus avain da cuminanza che savess porscher ina buna basa per ina nova experientscha, l'experientscha d'ina Svizra rumantscha cun in linguatg da scrittura, in fatg che lubescha tut in'autra preschientsha entaifer tut

las regiuns rumantschas e sur ils cunfins ora. Igl è in'expertscha che pusibilitescha forsa a quest pitschen linguatg rumantsch da viver vinavant anc insaquants decennis. Garanzias na dati qua però naginas. Betg cun «Pro Idioms» e betg cun rumantsch grischun. Igl è da gughegiar la vita, da ristgar ella, bainsavend che linguatgs na creschan betg sin las plantas – almain betg senza tgira.

Dapi prest 30 onns datti il rumantsch grischun. Cler ch'el n'è betg perfetg. Cler ch'ils iniziants da lezzas uras han era fatg sbags. (Sulettamain tgi che na fa nagut, na fa era betg sbags.) Cler ch'il rumantsch grischun è sa derasà cun il temp sin pastgiras ch'eran oriundemain betg planisadas per el. Quai è la dinamica dal svilup en praticamain tut ils secturs da la vita: en famiglia, en la rait da vias, en la medischina, en il mund da l'art, da la comunicaziun, la construziun, l'energia, l'electronica etc. E cunquai ch'in linguatg ha in'autra dinamica ch'in conto da banca daventan pleds sco «garantir e refusar» flosclas. Per far frunt a la dinamica d'in svilup dovrà mirveglia (vulair savair dapli), respect, responsabladad e buns disputs per eruir tge che quinta, tge che vala e tge che fa senn. Oz, ma era damaun.

Pli probabel na fai betg in grond senn che las vischnancas da Zerneubain da Trun publitgeschan davent dad immediat lur communicaziuns communalas en rumantsch grischun. I fiss era sbaglià da pretender che tut ils creschids stoppian emprender activamain da scriver en quest linguatg. Jau legel vinavant gugent en La Quotidiana ils artigels dad Ursicin G. G. scrits en sursilvan, ubain ils artigels dal Chardun scrits per gronda part en ladin. Ed igl è bain cler che las scripturas ed ils poets èn libers da scriver en tge idioms u linguatgs ch'els vulan – inclusiv il tudestg. Ma ils uffants dal Grischun rumantsch duessan ussa, suenter ina generaziun ch'i dat il rumantsch grischun, emprender da scriver e leger rumantsch grischun davent da la bell'entschatta. L'argument dals scolasts e da las scolasts ch'ils uffants sajan surdumandads na perschuada betg. Ils uffants fissan sulettamain surdumandads sch'els vegnissan alfabetisads en lur idiom e manglassan pir suenter anc supplementarmain emprender da scriver e leger il rumantsch grischun. Ma sche nus dain oz la schanza ad els d'emprender da scriver e leger la furma rumantscha unifitgada (quai ch'els fan «sco scha nüglia nu füss») sch'avrin nus ad els bleras portas e dain ad els già ussa buns e bels meds d'instrucziun per suenter.

Cler ch'jau sun per il rumantsch grischun sco linguatg d'alfabetisaziun en scola. Quai na vul betg dir ch'ils idioms stoppian vegnir bandischads ord scola. Ma quai ch'ils uffants dal Grischun talian e dal Grischun tudestg fan gia daditg, e ch'ils Jauers han fatg cun il valader ed ils Tuatschins cun il sursilvan decennis a la lunga, quai èn er ils uffants da la Cadi e da l'Engiadina Bassa abels da far: Empreder davent da l'entschatta da scriver e leger la furma d'in linguatg standardisà – sco il Hochdeutsch en il Grischun tudestg. Quai n'è nagin impediment per scriver SMS als consolars e cartas da las vacanzas al non en l'agen idiom. Naturalmain, per ils geniturs e per tats e tattas che vulan gidar a far ils pensums è l'alfabetisa-

ziun en rumantsch grischun ina sfida, ina provocaziun. Ma ina ch'ha er aspects positivs: Ina ch'envida ils creschids d'emprender insatge nov e guardar cun eglz dad oz en ils novs meds d'instrucziun, ina che dat als Rumantschs ed a las Rumantschas da pitschen ensi il sentiment da far part dad ina cuminanza ch'ha glieud er anc da tschella vart da l'aua.

La «Pro Idioms» dat er in sentiment da cuminanza. Ma jau na fid betg a questa cuminanza. Il sulet ch'unescha en quest cumbat l'Engiadina cun la Surselva è numnademain l'idea d'in inimi cuminaivel: il rumantsch grischun. Cura che l'unda da forza ed engaschi tschessa returnan las duas regiuns rumantschas mintgina enavos en ses mund e nagn n'ha mirveglia pli da tschel. Consultai la pagina www.proidioms.ch e vus savais dapli. Il concurrent dals idioms rumantschs n'è betg il rumantsch grischun, mabain il tudestg. E dal rest: Esser Rumantsch u esser Rumantscha è per fortuna mo ina pitschna part da noss'identidad sco carstgauns. Quai emprendan er ils uffants oz fitg spert. Scuflar si questa identidad e pretender sco Giacun Hasper Muoth «romonsch ei tia sort tiu truament» fiss bravamain surfatg en in temp global e da gronda libertad individuala.

Jau sun optimista: Primo perquai ch'il rumantsch grischun è sa cumprovaògia en blers secturs e secundo perquai ch'ils fritgs che prospereschian sin la planta rumantsch grischun èn per part fitg savurus. Els èn ina plivalur ch'i na dess betg sch'i na dess il rumantsch grischun. Jau patratg vi dal «LIR» (Lexicon istoric retic), vi da las paginas d'internet da RTR.ch, pledarigrond.ch, chattà.ch, jau patratg vi da firmas sco la Banca chantunala che tramettan sin giavisch lur corrispondenza per rumantsch, jau patratg vi da «Passins», «Punts» e «Puntinas», ed jau patratg vi da la versiun rumantscha da la melodia dals Beatles «I dat sulegl». Fiss bain donn da refusar tut quai.